

**Zeitschrift:** Igl Ischi : organ della Romania (Societat de Students Romontschs)

**Herausgeber:** Romania (Societat de Students Romontschs)

**Band:** 16 (1918)

**Rubrik:** Rapport sur della 21avla redunonza gen. della Romania tenida ils 3 da Settember 1916 a Razen

#### Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

#### Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

#### Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

**Download PDF:** 30.07.2025

**ETH-Bibliothek Zürich, E-Periodica, <https://www.e-periodica.ch>**

**RAPPORT**  
**sur della 21<sup>avla</sup> redunonza gen. della Romania**  
tenida ils 3 de Settember 1916  
**a Razen.**

Tgei muntan bein ils schems e plogns, che nies «cavagl ner» sto suspirar oz per ascender la teissa de Bonaduz? Aschia sedomondavan ils jasters. Pil fegl romontsch era la risposta plascheiva e legreivla. Ils fegls ed amitgs della Romania ein puspei seraspai tier lur redunonza populara, quellaga ella capitala dil Plaun, a Razen. — La Cadi fuva respectablamein representada, mo era Domat e l'Uniuromontscha de Cuera, nos rempars encunter l'invasiun tudestga, han priu part en ludeivla maniera; era il Surmir ha termess enzaconts premurai campiuns de nossa viarva.

Ils activs ed ina biala raspada de passivs ein seredunai ella sala bein decorada dil «Rhaetus», per rugalar las fatschentas internas della societat. Il president Stanislaus Deplazes beneventa ils presents e constatescha cun veseivla satisfacziun, che ei seigi aunc mai stau tonts activs tier la redunonza annuala della Romania. Igl actuar Giusep Condrau, stud. jur. legia il protocoll della davosa redunonza a Mustér 1915, il qual vegn sanczionaus. Sgr. scolast Baseli Giger dat rapport dals quens, ils quals muossan ina facultat bein recuvrada. Aschinavon sco ei setractescha de pli grondas summas, recammonda Sgr. adv. Dr. G. Desax, ch' ins duei eleger silmeins in revisur de quens e quei vegn approbau. Plinavon eis ei era vegniu concludiu de prender detschartamein a mauns l'ediziun d' in niev opus periodic «Nies Tschespet» en fuorma

de broschuras de lectura populara. L' execuziun de quei conclus vegn surdada alla redacziun digl Ischi. — Era la questiun d' in «cudischet de canzuns» per las compagnias de mats e per la Romania duei vegnir messa en moviment; quella caussa vegn surschada al niev comite, il qual ha per quei intent d' eleger ina commissiun de 5 commembers. — Ariguard nies organ, igl Ischi, fa nies stimau Sgr. redactur Dr. P. Tuor attents sil legreivel factum, che tut ils exemplars dela davosa ediziun seigien vendi, e quei inspirescha il conclus, ch' igl Ischi duei vegnir ingrondius ed il diember d' exemplars augmentaus. — El niev comite vegnan elegi:

*Activus:*

Giusep Condrau, jur. Mustér, president;  
Gion Jeger, med. Razen, vice-president;  
Gion Capaul, theor. Razen, actuari.

*Commembers honorars:*

Rev. Sgr. plev. Rest Giusep Caminada  
Sgr. redactur Giusep Demont.

*Revisur de quents:*

Sgr. Dr. Conradin Hess, Mustér.

Pli splendusa ed animada ei la redunonza populara stada, tier la quala la musica de Razen accampogna il pievel presents viers il vegl casti, las portas dil qual vegnan buca pli seradas da cavalliers e baruns. In liug pli adattau per ina redunonza havess ins buca saviu anflar, schege che viaspis vilentadas vulevan defender lur habita-ziun ella veglia miraglia dil casti. —

Stanislaus Deplazes, president della Romania, beneventa cun viarv' elegida la gronda raspada romontscha exponend ils motivs, pertgei che nus

essan e vulein restar Romontschs. Il motiv de siu oreifer e fulminont plaid filologic ei stau:

«O mumma romontscha, o mumma carina  
Nus lein tia tschontscha salvar per adina.»

Igl applaus entusiasmau ha mussau ecclatantamein, ch' il giuven oratur hagi veramein capiu de captivar ed inflammar la fuola per nossa cara mumma romontscha. — Silsuenter referescha Sgr. Prof. Dr. Tuor, «sur digl operar de Sgr. Prof. Dr. Casp. Decurtins per nies Romontsch.» El plaida ruasseivel, clar ed entelgenteivel; de quei ei stau perdetga la seriusa attenziun dils auditurs. Havend enumerau ed appreziau las ovras publicadas de Sgr. Prof. Dr. Decurtins drezza il referent l'attenziun dil pievel sillas ideas e siu operar ariguard nies lungatg matern. Cun breigia e gronda stenta ha nies Caspar empruau de svegliar e carschentar la mur per il lungatg vernachel denter il pievel tras fundaziun dil «Tschespèt» e denter ils students tras fundaziun della Romania e digl Ischi. — L'auta miraglia dil casti ha rebattiu dal viv applaus dil pievel. Sgr. vegl cuss. guv. Balt. Vieli seregora aunc en quorts plaids dils merets de Dr. Decurtins sco um della politica conservativa catolica dil Grischun. Il chor viril de Razen lai aunc udir in pèr bialas canzuns e la raspada serenda puspei giuedora viers il vitg, nua che nus vesein las giuvnas gia fatschentadas cun distribuir la biala marca de Dr. Decurtins, il tschupi che la Romania ha porschiu a siu fundatur. —

Plaunsiu serendan ils commembers puspei ella sala dil Rhaetus tier la part hilarica. Rev. Sgr. Bl. Platz plev. de Razen e Sgr. Caluori dent. de Domat plaidan en lur lungatg local pil susteniment della viarva romontscha. Sgr. Dr. G. Willi

disquora en num dell' «Uniuromontsch» a Cuera e rapporta, che quella duei esser ussa a Cuera ina ferma posiziun encunter il camp german (ella vivi!). Aunc ditg eis ei vegniu sediverti; interes-santas peroraziuns e producziuns en poesias e cant ein succedidas. Giachen Giusep Paly, stud. phil. de Caprau ei passaus si sco niev poet. —

Nus stuein taxar il dequors e success della reuniu a Razen per fetg buns. Saluteivels e progressivs conclus, che demuossan aviartamein il fiug, che nos amitgs han per lur lungatg-mumma, ein vegni pri e nuslein sperar, che tals vegnien era exequi sco sontg' obligaziun visavi a nies scazi retic, il Romontsch. Eviva nossa viarva!

Gion Capaul, theol., actuar della Romania.

## RAPPORT

sur della 22<sup>avla</sup> e 23<sup>avla</sup> redunonza gen. della Romania

ils 2 de Settember 1917

### a Vella.

Sin l' antica tuor della venerabla baselgia de Pleiv, en vesta dil péz Regina e d' in tschupi de vitgs e vischnauncas lumnezianas, sgolatschava ils 2 de Settember 1917 la bandiera della Romania. Il liung e stentus viadi sco era la sgarscheivla uiara mundiala, han buca saviu e pudiu stermentar ils fegls della musa pompelusa de comparer era quest onn tier la redunonza generala. Cun ina certa luschezia e cun ferma speranza sin ina buna realisaziun de nies scoppo, dumbravan nus denter nossas retschas campiuns ord las pli allontanadas val-ladas e vischnauncas della Cadi, premurai filisters dil Plaun, stimai e carezai compatriots de Sur-